

Risiko bencana: Jabatan Hutan pantau taman eko rimba

Oleh **BADRUL HAFIZAN MAT ISA**
badrul.isa@mediamulia.com.my

SEREMBAN: Jabatan Perhutanan Negeri Sembilan memantau keadaan cuaca semasa untuk mengambil langkah-langkah awal menghadapi risiko berlakunya kejadian tanah runtuh atau kepala air khususnya di kawasan taman negeri dan taman-taman eko rimba di negeri ini.

Pengarah Perhutanan negeri, Hamidi Abd. Halim berkata, pihaknya mengambil perhatian sebarang risiko yang boleh berlaku menjelang tempoh berlakunya Monsun Timur Laut termasuk sentiasa mendapatkan maklumat daripada Jabatan Meteorologi Malaysia (MetMalaysia) serta Jabatan Mineral dan Geosains Malaysia.

“Jika dilihat maklumat dari MetMalaysia, di Negeri Sembilan risikonya masih rendah, bagaimanapun kami sentiasa memantau.

“Kebiasaannya bagi langkah berjaga-jaga, kami menutup taman-taman eko rimba, taman negeri dan trek pendakian namun setakat ini ia masih dibuka dan jika tutup kami akan memaklumkan.

“Pegawai-pegawai hutan juga sentiasa berada di lokasi yang telah dikenal pasti bagi memberi peringatan kepada orang ra-



TAMAN Eko Rimba Ulu Bendul, Kuala Pilah di Negeri Sembilan adalah antara kawasan popular kunjungan orang ramai namun salah satu lokasi sering berlakunya kejadian kepala air. - UTUSAN/MOHD. SHAHJEHAN MAAMIN

mai,” katanya ketika dihubungi *Utusan Malaysia* di sini.

Akhbar ini semalam melaporkan, sebanyak 104 lokasi cerun di seluruh negara dikenal pasti sangat kritikal untuk berlaku tanah runtuh dan aliran puing terutama menjelang tempoh Monsun Timur Laut bulan depan.

Menerusi laporan itu, Jabatan Mineral dan Geosains memak-

lumkan sedang menjalankan pemetaan di tujuh lokasi taman eko rimba yang berpotensi berlakunya bencana aliran puing atau pergerakan tanah termasuk di Jeram Toi, Jelevu, Negeri Sembilan.

Sementara itu Hamidi berkata, Taman Eko Rimba Jeram Toi kini masih lagi dalam proses kerja-kerja pembaikan dan pembinaan semula selepas ia

musnah susulan kejadian hujan lebat berterusan dan banjir besar yang berlaku pada pertengahan Disember 2021.

“Jeram Toi masih lagi dalam pembaikan dan dijangka siap pada awal tahun depan dan ia bergantung kepada risiko kejadian tanah runtuh di sekitar kawasan itu hasil laporan Jabatan Mineral dan Geosains,” katanya.